

Duos indigens sun champions svizzers da bob a duos

Reto Florin e Dario Gross han persvas la Svizra

Duos dals «cool-runners» da la Val Müstair sun champions svizzers da la categoria da seniors da boba a duos. Reto Florin da Samedan e Dario Gross da Tschierv han persvas: Ils duos «bobists da hobi» han guadagnà e sun daspö dumengia ils novs champions svizzers da seniors da bob a duos.

■ Da Martina Fontana / anr

Il traget dad ir cul bob da San Murezzan es cuntshaint sün tuot il muond. Reto Florin e Dario Gross nu sun quai eir; però plüt-schönch sco ils «cool-runners» o dit in oter möd, ils «exots» da lur categoria. Cumbain ch'els nu fan propcha bler trenamaint per lur hobi, l'ir cul bob, es per las squadras da bob a duos naziunalas ed internaziunalas adüna darcheu ün sfida chi vala il prüm da survendscher. «Dad ir cul bob es per mai e meis cusdrin Dario ün hobi», disch in quist connex il masinunz dal bob vendschader dal champiunadi svizzer dals seniors da quist on, Reto Florin da Samedan. Cha trenamaints specials per ir cul bob nu fetschna... «Nus vain tuots duos nos manster e fain il sport da bob per uschè dir ‚dasperapro‘», agumentescha'l cun tschera riantada. Ch'els hajan però tuots duos grond plaschair da far quai e cha gio da tuot basta quai per persvader: «Nos plaschair da far quist sport es grond e sco chi para basta quella motivaziun per guadagnar», intuna'l riond. Ils resultats cha'l pèrin oriund da la Val Müstair ha ragiunt d'ürant quista stagiun demuossa quai in möd fich cler: Pro mincha cuorsa da bob a duos han els d'ürant quista stagiun ragiunt üna piazza sül podest. Il champiunadi svizzer da seniors chi van cul bob a duos han els guadagnà cun circa üna secunda avantag avant la squadra da bob da Roland Buob e Stefan Wyss. Ultra da quai han ils duos jauers Reto Florin e Dario Gross ragiunt in dumengia – d'ürant la seguonda concurrenza dal di – la seguonda piazza pro'l «Foto Albrecht Cup».

«Per nus nu's müda bler»

«Nus duos vain natüralmaing grond plaschair dad esser dvantats champions svizzers illa categoria da seniors», manaja Reto Florin. Cha bler nu müdarà quel titel però a regard lur möd da far il sport dad ir cul bob. «Nus vulain restar uschè sco cha eschan», disch el. Chi saja però schont bel da pudair demuossar buns resultats impusüt als sponsuors chi hajan investi e cret in els. «Eu n'ha adüna gnü fiduzcha in meis team e n'ha uos-

sa darcheu üna vouta survgni la conferma cha mi'intuiziun d'eira güsta», declera in quist connex il sponsur principal dals sportists Reto Florin e Dario Gross, Max Gyga

da Samedan. Seis logo da sia firma «Woma» da Samedan straglüscha nempe sül bob vendschader da quista fin d'eivna ed es ... impusüt davo prestaziuns uschè positivas sco quella dals duos Jauers prestada in dumengia, fich preziusa. «Davo la cuorsa n'ha ja güsta prolunghi il contrat culs duos bobists», ha dit Gyga cun plaschair. Tant el sco eir ils duos bobist jauers vöglian s'ingaschar cun forzas unidas per persvader eir in avegnir: «Nus nun eschan ils professionalists – noss cours battan però per nos sport e quai ans dà la forza da cuntinuar cun schlantsch e blera buna vöglija», disch'na.



Dario Gross da Tschierv e Reto Florin da Samedan sun ils champions svizzers da la categoria da seniors da bob a duos da quist on. Foto mad